

15. oktober 2013

UKA 2013/29 & 32  
Anders Olsen

**Inoqutigiit isertitaasa annertussusaat aallaavigalugu utoqqalinersiat ilanngaateqartinneqartarnerisa atorunnaarsinneqarnissaa siunertaralugu Utoqqalinermi pensionisiat pillugit Inatsisartut peqqussutaat nr. 3. 7. maj 2007-imeersup Naalakkersuisut kingusinnerpaamik UKA14-mi allanngortitsinissaat pillugu Inatsisartuni aalajangiiffigisassatut siunnersuut.**

(Inatsisartunut ilaasortaq Kristian Jeremiassen, Siumut)

**Utoqqalinersiuteqartut angerlasimaffimmini ikiorteqartarnerminnut akiliisarunnaarnissaat siunertaralugu Inatsisartut peqqussutaat nr. 15, 20. november 2006-imeersumi § 29-ip allanngortinneqarnissaa siunertaralugu Naalakkersuisut siunnersuummik saqummiusseqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Kristian Jeremiassen, Siumut)

Inatsisartunut ilaasortaq Siumumeersoq Kristian Jeremiassen utoqqalinermi pensionisiallit pensionisiaasa inoqutigiit isertitaasa annertussusaat aallaavigalugu ilanngaateqartinneqartarnerisa atorunnaarsinneqarnissaannik taamatuttaaq utoqqalinersiuteqartut angerlasimaffimmini ikiorteqartarnerminnut akiliisarunnaarnissaat siunertaralugit siunnersuutai soqutiginarluartut Siumumiit imaattumik oqaaseqarfigissavagut.

Siumumi tunngaviusumik isumarput tassaavoq utoqqaat nuannersumik, qiimasumik, piluarnartumik toqqissisimanartumillu inuuneqarsinnaanissamut periarfissaqartariaqartut. Innuttaasut utoqqalisut inuiaqatigiinni annertuumik sulinikkut kiffartuussinikkullu inuiaqatigiittut pitsaasumik tunngavissinneqarnissarput pillugu suliaqarsimasut suliffeqarnermiit tunuariartuaarnissaat pitsaasumik ataqqinartumillu sinaakkusersortariaqarparput. Amikkit-siuar-neq ernummateqartuarneq utoqqaat ulluinnarni inuuneranni inituallaaqaat.

Utoqqalinermi pensionisiaqartitsineq pillugu Inatsisartuni oqallittarnerit annertuut ingerla-juarsimapput utoqqartatta pitsaasumik utoqqalinermi atugaqassaqaarnissaat qulakkeerniarlugu. Tamannalu maanna aamma tamanna pivoq, tassami inuiaqatigiittut ineriartornitsinni atugassatigut pitsanngorsaajuarnissat avaqqunneqarsinnaangimmata. Utoqqalinersiat aamma matumani pineqarpata.

Qujanartumik ukioqqortusiartorneq malunnaatilimmik annertusiartorpoq, tamannalu ilaagitigut inuusaatip allanngogisup takussutissaraa. Siunnerfillu taanna sapanginnagu suli pitsanngorsarneqartuartaqarpoq, nuannaarutigisariaqarlunilu utoqqaat amerligaluttuinnartut suli pisinnaallutik inuiaqatigiinni suleqataarusunnerat. Siumummi anguniagaraa inuit pisiaqartinneqartut sulerusuttullu tamarmik nunatta napatinneranut suleqataanissaat.

Siunnersuuteqartup aallarniinermini erseqqissaatigaa utoqqaat pisinnaasutut misigisimasut aningaasarsiorusuttullu namminneq akisussaaffigisariaqaraat qanoq saniatigut sulisar-

nerminnit isertitaqartiginissartik, tamannalu Siumumi isumaqatigilluinnaratsigu oqaatigissavarput. Tassami inuit utoqqaligaluarlutik peqqissuunertik pissutigalugu suliinnarnissamik kissaateqarpata tapersorsorneqartariaqarput, taakkuami inuunerminnit suliffimmilu ingerlataminni misilittagaqartuupput inuusuttunut suliffeqartunut qularnangitsumik ikorfartuuttaaluarsinnaasut.

Siunnersuuteqartuttaaq utoqqalinersianik ilanngaaffigitittarneq saniatigut killissaritat qaangerlugit isertitsisimagaanni ullutsinnut naleqqukkunnaarsoraa, isumaqarluni utoqqaat pisinnaasut pisinnaanertik aallaavigalugu sulinertik ingerlatissagaat. Tamannalu Siumumiit naappertuuttutut isigaarput, taamaammallu utoqqalinersiuteqartarnerup aaqqissuuneqarnera nanginneqassasoq Siumup sulissutiginiarpaa.

Inuup kialluunniit nammineq angerlarsimaffeqarnissani pingaartippaa ornigalugulu, aamma utoqqaat akornanni taamaappoq. Toqqissisimasumik inuuneqarnissaq aamma tassuunatigut pilersinneqartarmat.

Nuannaarutissaavoq utoqqaat amerlasuut nammineq angerlarsimaffimmini utoqqalinertik ingerlattarmassuk, tamannalu aamma utoqqaat akornanni peqqissutsikkut pisinnaasutsikkullu ajunngitsumik inissisimasoqarnera takussutissippaa.

Utoqqalinersiuteqartulli aamma ilaqarput assigiinngitsut pissutigalugit angerlarsimaffimmini ikiorteqartariaqartartunik. Taakkualu sapinngisamik pitsaanerpaamik artukkiinginerpaamillu atugassaqartinneqarnissaat qulakkeerniartariaqarparput. Taamaattumik aalajangersakkap arlaatigut aaqqiivigineqarsinnaanissaa Siumumiit suleqataaffigissavarput.

Inuuniarnermimi atugassarititaasut ullutsinni suli unamminartorujussuupput, inigisamut, kallerup inneranut, imermut inuussutissanullu aningaasat atugassat naammattusaartumik atugassaasariaqartarmata. Taamaattumik utoqqalinerisiuteqartut angerlarsimaffimmini ikiorteqartarnerminnut akiliisarunnaarnissaat siunertaralugu siunnersuut Siumumiit naliersoqqinnissaa isumaqarfigaarput aaqqiissutissamillu pitsaanerusumik ujartuinissamut suleqataassalluta.

Naalakkersuisut akissuteqaataani maluginiarparput ilaatigut utoqqaat atugarisaat pillugit misissuisoqarnissaanik siunniussisoqarsimasoq, isumaginninnikkullu aaqqissuuseqqinnissaq siunertaralugu Naalakkersuisut allannguutissanik suliaqarneq aallartereersimallugu. Tamanna soorunami Siumumiit iluarisimaarparput erseqqissumik utoqqalinersialinnut tunngasut qulaajarneqartussanngussammata, utoqqarnullu atugassarititaasut ilivitsuusumik aaqqiissuteqarfigineqarnissaannik kinguneqarnissaa naatsorsuutigalutigu.

Taamatut oqaaseqarluta Naalakkersuisut allannguutissatut siunnersuutaat Siumumiit akuersaaratsigu oqaatigissavarput, suli allu Ilaqutariinnermut Peqqissutsimullu ataatsimiititalia-mut ingerlaqqinnissaa innersuussutigalugu.